

# Lu Centènaire du Chapuis

## I.

Lu sèt octôbe, citoyins, ciste annêye,  
C'est po nos autes one grande fiêsse, on grand djoû,  
Su nos n'léhant minme nin des litanêyes  
A nosse Chapuis, nos irans dire bondjoû.  
Nos n'irans nin dusqui d'vins les mansardes  
Briber les çans du totes les pauvrès djins  
Ni l's î consî minme qu'i vindèh' leûs hardes  
Po fêr on don a one viêrge ou on saint.

## REFRIN

Tot come vos sèrez moussi  
Chapuis vos l' vinrez fiêrtî,  
Foû d' vos potches, ni foû d'vos mains  
Nos n' dumandrans né d' l'ârdjint.  
Ci djoû la qu' tot l' monde accouît  
Çou qu' nos volans c'est vosse coûr  
La cantate vinez hoûter  
Po l'apôte dè l' liberté.

## II

Franchimontwès et djins dè payis d' Lidje,  
Vola cint ans qu' sol plèce dè Sablon  
Come d'one fleur qu' l' djârdinî còpe lu tidje  
Chapuis moréve, martyr dè l' trahison.  
Lu qu' si-èsprit aveût pris l' haute volêye  
Vès çou qu'esteût du pus bê, du pus grand  
Po l' bin dè peûpe, fêr l' sacrifice du s' vèye  
Honte a ses djudjes, honte à préce du Mèan.

## REFRIN

Come onk qu'a hapé, moudri  
I-est condamné a mori  
Même les sôdârts qu'èl wârdî  
Avâ les vôyes èl plindît  
Du Lidje a Vèrvî, les djins  
L' vèyant d'hit v'la l'inocint  
Est-i possipe qu'ont l'aireût  
Touwer l' ci qui d'find nos dreûts.

## III

Lu deûs d' janvier, foû dè l' vile manhon d'vèye,  
Chapuis sortéve, c'est po z-aler mori  
Du tos costés, les rawes èstît bârêyes,  
Pwètes èt fignièsses, on n' wèzéve les drovi.  
Noûf meûs d' cachot, pwis su longue maladêye  
Lu mwèrt du s' fame èt les pônes po si-êfant  
L'ont fait maigri, lu, qu'esteût si plein d' vèye  
Et come Jésus, i mourt a trinte-treûs ans.

## REFRIN

Autrichiens et Hollandais  
Autou dè l' tchèrète wârdèt  
Chapuis assiou so s'wahê  
Sol tims qu' les mônes priyèt  
L' cruwél gouverneur Detrooz  
A l' tiêsse dè cortège a tch'vâ  
Tot fir du lu ci djoû la  
Cumandéve l'assassinat.

## IV

Du drwète et d' gauche c'esteût tos sentinèles  
Du les manhons, pèrsonne nu moussive foû  
Et so Vèrvî, c'esteût tot come on vwèle  
Mins ci djoû là, c'esteût st-on vwèle du doû.  
Dri les cwârès, les djins les ouy's plins d' lâmes  
Louki passer duvins 'ne tchèrète a boûs  
Lu ci qu'aveut tant d' corèdje et tant d'âme  
Et qu' du s' vèye, c'esteût lu dièrin djoû.

## REFRIN

I-aveût les neûrès cocâdes  
Qu'estit so l' plèce a l'awâde  
Turtos âtou d' l'échafâ  
Come one volêye du cwèrbâ  
Du djôye i s' frotit les mains  
Tot d'hant : « Duvins quéques mounints  
Nosse pârti s'ârè vindjî  
Du l'ame qu'estème tot Vèrvî.

## V

Vola l' tchèrète qui toûne à pont d' Djône-Pire  
Mins so l' nivaye on n' l'ètind né rôler  
Les sôdârts qu'ont portant dès coûrs du pire  
Sont tos honteûs, on veut leûs mains trôler.  
Tims qu' Fréron a Chapuis lét s' sintince  
I r'tûse a l' mwèrt du s' fame qui l'inmève tant  
Et tot d'on còp a s' pauve Cécile i pinse  
I r'trouvrè l' mère, mins fât qui qwite l'êfant.

## REFRIN

A dreûte les mônes pâtrièt  
Chapuis est la d'avant l' blokê  
L' bourriâ a costé ratind  
Les tabeurs fêt st-on roul'mint  
Adon l' gouverneur Detrooz  
Fait on séne, Chapuis a gn'gnos  
Duvant d' mori dit st-èco  
Dju pardone a mes bourriâs.

## VI

D'vins les manèdjes, si on z-ouh' polou vèye  
C'esteût tos pleûrs, tos plaintes èt tos djur'mints  
Grégwère Chapuis so l' blokê l' tiêsse bahêye  
Rawâde lu mwèrt, qui vét bin londjinnemint  
Çu lu bourriâ, c'esteût sûr one ètinde,  
Po fêr sofri Chapuis co pus longtims  
Lèva sèt fêy's su hèpe et l' lèyi d'hinde.  
Po 'nnè fini, i soyive a deûs mains.

## REFRIN

Les mônes plins d' song su r'tirèt  
Les neûrès cocâdes brèyèt,  
Les djins, les sôdârts plorèt  
Lu song coréve a potè  
Duvins mèye ans minme après  
Du c' crime la on s'sovinnè  
Come du Jeanne d'Arc sèyans firs  
Du Chapuis d' wârdèr l' souv'nir.

## VII

Dè bon doctèur, cèlebrans lu mémwère  
A nos êfants porlans è tos les djoûs  
Du s'sov'ni d'lu, chacun s'enn'è fait glwère  
C'est-a Vèrvî qu' Chapuis a vèyou l' djoû.  
So les hauteurs d'âs environs d' nosse vèye  
Aûs Gris-Tchèvri, nos grands-pères l'ont hoûté  
Conte lu clergé dusfinde lu libe-pinsêye  
Conte les tyrans dusfinde lu liberté.

## REFRIN

Ci djoû la nos l' fièstirans  
Lu coûr plin d' djoye tot tchantant  
On vî râvion, on novè  
Tot bovant on p'tit hèn-tè.  
So l' plèce duvant l' monumint  
Alans tos l' tchapê al main  
Saluer avou firté  
Lu Martyr dè l' Liberté.